

# Qob'ajtze'en Ch'in Tuj Qyol

Kyi'j Junjun Chist Xk'a'ma'me'



**Qob'ajtze'en Ch'in**  
**Tuj Qyol**  
**Kyi'j Junjun Chist Xk'a'ma'me'**

Riámonos en Nuestra Lengua  
Sobre Chistes de Otros Pueblos

*" Tzajel Aq'uma' Tuj Qyol "*

Libros Maya-Tektiteko

Instituto Lingüístico de Verano

Segunda Edición, 1997

## Tumelil Te U'j

	Txaq
Aj Ja' Ojaw Tze'en Jun Xhiky .....	1
Jun Tramp .....	5
Jun Xhiky Ky'i Jun K'wa'l Q'ol .....	9
Jun León Tuky'i Kaj Tor .....	13
Tidi' Oxik Te'e' Jun Tx'ya'n Tuj A' .....	15
Txq'an Kxhlan Worte' B'ix Txq'an ky Flake' .....	16
Jun Txil Tuky'i Jun Sanik .....	17
Te Xkulkwitx' Aj Tgan Tuq Tok Palom .....	19
Jun Chap Ky'i Jun Kyej .....	21
Jun Kyej Tuj Montañ .....	23
Jun Ichan Tuky'i Jun Loxh .....	27
Jun Itx' Tuj K'ul Tuky'i Jun Itx' Tuj Amaq' .....	30
Jun Ichan Tuky'i Jun Xuj Xo'j .....	33
Jun Q'opoj Tuky'i Jun Tb'i'ixh B'ix Jun Xo'j .....	37
Ox Chib Tuky'i Jun Kulelj .....	40
Tal Lo'xh .....	43
Jun Kyej Tuky'i Jun Xtx'o' .....	46
Jun Alon Chib Tuky'i Jun Xo'j .....	48
Ox Kuch Tuky'i Jun Xo'j .....	51

Título: *Qob'ajtz'e'en Ch'in Tuj Qyol Kyi'j Junjun Chist Xk'a'ma'me'*

Título en Castellano: *Riámonos en Nuestra Lengua Sobre Chistes de Otros Pueblos*

Título Original: *Ko'cha'on Chist Tu Kyol*

Título Original En Castellano: *Oigamos Cuentos En Nuestra Lengua*

Una colección de chistes de varios lugares, escritos en el idioma Maya-Tektiteko de Tectitán, Huehuetenango, Guatemala, Centroamérica.

© 1997 por el Instituto Lingüístico de Verano.

Los derechos de autor le corresponde al Instituto Lingüístico de Verano.

*Información Sobre La Casa Editorial:*

El Instituto Lingüístico de Verano (ILV) es una institución internacional, no gubernamental y no lucrativa, cuyos miembros son voluntarios.

Desde 1934, el ILV se ha dedicado a proyectos de capacitación, alfabetización, investigación lingüística, traducción, publicación, ayuda médica y de desarrollo comunitario, para el bienestar de poblaciones autóctonas en más que 1000 comunidades lingüísticas de 50 países del mundo.

---

*Se espera que la publicación del presente libro anime a la gente de la comunidad lingüística maya-tektiteka a seguir adelante en la alfabetización, disfrutando el valor y la belleza de su idioma.*

---



Primera edición: 300 ejemplares, 1985.

Segunda edición, revisada: 100 ejemplares, 1997.



# Jun Xtxolil ti'j Ja U'j Ntzani

## Prólogo

El propósito de esta colección de chistes y cuentos folklóricos es, primero, poner en las manos de nuevos lectores Maya-Tektiteko un libro para que practiquen la lectura. El que practica mejorará su capacidad, pero el que no practica se le olvidará perdiendo así una de las riquezas más preciosas de la vida humana.

En segundo lugar, mi esperanza es que este libro, aunque pequeño, pueda dar un impulso significativo a la alfabetización de personas de habla Maya-Tektiteko.

El tercer propósito del presente volumen es simplemente para que nos divertamos escuchando estos cuentos y así poder gozar riéndonos. Como dice un proverbio de la Biblia, "Buen remedio es el corazón alegre."

Es una gran tristeza que hoy en día hay lugares del mundo donde las lenguas autóctonas no son apreciadas. En cambio, aquí en Guatemala hay aprecio para todas las lenguas vernáculas porque se les reconoce como una riqueza de la cultura guatemalteca y también como un precioso medio de comunicación de alto valor. Por eso, esperamos que este libro logre animar a todos aquellos que talvez pensaron que su idioma no era bueno porque no podía ser escrito. Pues, aquí está el Maya-Tektiteko escrito y ¡qué gozo es poder leerlo!

Quiero expresar mi más profunda gratitud a mi compañero de trabajo, Vidal Pérez. Palabras no son suficientes para describir como ha sido un gozo revisar este material con él, no sólo por las risas que este libro nos ha dado, sino también por todo lo que hemos aprendido por revisarlos juntamente. ¡Pixon atz werman tzan tpaj nim apasens wuky'i'l b'ix tzan tpaj k'onti'l nchsiktik tzan stzaj axnaq'tza' titz'a' te tumelil te qyol! ¡Pixon te yatz!

Lic. Edgar Stephen Beach Shipman



## Aj Ja' Ojaw Tze'en Jun Xhiky

Bwen, at tuq jun luwar laq'chik aj ja' tuq tjay te jun xhiky kyi. Te xhiky b'an list tuq kyi. Tetz ate' tuq kab'e' tbesin, jun xo'j ky'i jun os. B'ix tetz ko'chq tuq nk'ulun joder kyi'j tbesin kyi.

Ntons, jun q'ij etzaj kye tbesin, ojaw ktzyu' b'ix owok kyk'alo' ti'j jun tze'. B'an k'alo' owok kswa'. B'ix yaji kyi te xhiky kyi: «Pwes b'a'nalo ma'tx kyin'ok ek'alo' ti'j tze'. ¿Per tistil wetz ma'tx kyin'ok ek'alo'?» kyi te xhiky kyi.

«Tzan tpaj oxhch'okeyon te jun jkaltna» kyekyi kye tbesin tetz kyi.

Per te xhiky ojaw stze'.

«¿Tistil nxhstze'en?» kyi te xo'j tetz.

«Pwes last a'ix» kyi te xhiky kyi.

«¿Tistil last a'o'na?» kyi te xo'j.

«Last a'ix tzan tpaj k'onti'l etotzqi' jun luwar ja' b'a'n tzan qtze'en. Qa egan etze'en byenech ntons qob'ajxe'l e'el tetz, k'onti'l etotzqi' etetz ja' at jun tze' jul tuj b'ix tzi b'a'n qtze'en byenech» kyi te xhiky kyi.

Ntons kyi te os: «Otxe'l quky'i'la. Oztajel ayek'u' ja' atqet te tze' jul tuj.»

Ntons kyi te xhiky: «Bwenchaq. Kyinx'e'l etuky'i'l yek'ul te tetz. Per komo k'alomin, nlay b'antik nxik etuky'i'l» kyi te xhiky kyi.

«Pwes qa otxe'l yek'ul tetz ntons otxe'l qpuju'na. Per otxe'l jk'alo' awalq» kyi te xo'j tetz kyi.

«Pwes bwen» kyi te xhiky. «Pwes bwen. B'a'n. Oxe'l nyuk'u'tz» kyi te xhiky kyi.

Ntons eb'ajxik b'et, per jowo' te xhiky kyitza' kyi. Yaji eb'ajpon tk'atzaj jun ma tij tze' kyi.

«Pwes ntzani te tze'» kyi te xhiky kyi. «Qa egan intox esi' ewi' tuj te jul tzan tok ete'e' byenech tidi' tuj.»

«B'a'ntzun. Owokex qsi' qwi' tuj» kyekyi te xo'j ky'i te os kyi.

Yaji owox kyen, derepent kyetz lab'un kye twinqil kab' kyi'j kyi. Eb'ajtzaj kyetz, eb'aj'oqik tuj k'ul, yatzun te las okaj ktzoqpi'. Jun rat kyb'ajxiknaj oqik tuj k'ul tzan taq'ikal kylob'en kye twinqil kab' kyi.

Yatzun te xhiky cha okaj tzoqpi' b'ix ntze'en kyi'j kyi.


«Ajna'l nkyinchalaj eti'j. Pixon etetz ma'tx kyinkaj etzoqpi'. Ma xwa'tz nyek'u'tz jun luwar per nya'tx tuq b'an'ax witza'. Cha ma qet wiq'i' eti'j xwa'tz nyek'u'tz etetz tjay twinqil kab'. Last etetz a'ix pero wetz b'an nkyintze'en eti'j, nkyintz'ajb'an nq'ab' eti'j tzan tpaj ma'tx kxoqik» kyi te xhiky kyi.


Ntons ikxji eb'ajqet iq'i' kyi'j kye xo'j ky'i te os tzan te



xhiky kyi. Tzan tpaj te xhiky b'an list tuq tzan k'on tuq txik kykalti'.

Bwen, a'ox ntzani aj oky'ik ti'j jun xhiky tuky'i jun os b'ix tuky'i jun xo'j.





## Jun Tramp

Bwen, at tuq jun xhiky b'an list kyi. B'an tgan tuq txb'ak'an kyi.

«Wetz ngan nxik xb'ak'on tuj jun luwar laq'chik b'an alegr tzan tpaj wetz njay tzani b'an trist» kyi te xhiky kyi. «Ntons kajel nlam'o' njay byenech tzan k'on kyox tidi'chq txkup tuj» kyi kyi.

Ntons tetz oxik b'et b'ix toqwen tuq b'ix nb'itzan tuq nb'et kyi. Tetz nchalaj tuq kyi.

Ya ma pon ja' at tkojoj te xo'j, tb'anil te kjoj txik te'e' b'an q'eq, q'eq, q'eq. B'an q'eq txik te'e' te kjoj kyi.

«Baaaa, tb'anil tkojoj te xo'jni. Wetz kyin'okex tuj. O'kix oxel' nniky'b'e' titza' twab'ajil te kjoj» kyi te xhiky.

Ya ma tz'ox tuj, atqet tuq te tramp. Owox tuj te kjoj b'ix dech oqex tuj te tramp kyi tzan tpaj te xo'j ojetq tuq kaj tk'ulu' byenech te tramp tuky'i las. Te las yob'a' tuq ti'j jun tze' kyi. Yaji te xhiky k'onti'l owox tuj te kjoj cha okaj yo'let te xhiky tuj te tramp kyi.

«Pikr te xo'j! Dech ma kyinkaj tuj stramp» kyi te xhiky kyi.

Ntons yaji ikja'n tuq stzaj te jun os kyi. B'an mok' tuq te

os b'ix yatzun te xhiky nximan, nyolin tuq tanim. “¿Titza' kyin'elax tuj tramp? Aa pwes, te os b'an mok'. Oxe'l nq'uma' te os per cha oqtel wiq'i' tzan wel stzoqpi' tuj tramp tzan tpaj tetz b'an mok'” kyi te xhiky kyi.

Ntons yaji oxik tq'uma': «¿Je'ky Os! ¿Titza' atich yatz?» kyi te xhiky ikxjani kyi. «Wetz nkyink'ulun ganar jweb' ketzal nq'ij tzani» kyi kyi.

«¿Ti' awaq'un?»

«Pwes wetz nkyintza'jen kjoj» kyi te xhiky kyi.

«¿Tistilji?» kyi te os.

«Pwes wetz nqet nkolo' tkojoj te xo'j tzan k'on txik lo' tzan kye pich'» kyi te xhiky kyi.

«Aa bwen. Pwes wetz ax ngan jun waq'un iktza' awaq'un yatzni. Yatz galan awaq'un. Nchk'ulun ganar nim, ale' jweb' ketzal aq'ij» kyi te os kyi.

«Tzun, nkyink'ulun ganar nim ntumin. Agan awaq'un pero k'onti'l. Last a'ich k'onti'l awaq'un b'ix ch'inky te ninq'ij b'ix k'onti'l atumin tzan stzaj aloq'o' tq'anaq axu'jel» kyi te xhiky ikxjani kyi.

«Ay b'an'ax» kyi te os kyi. «Last nxu'jel nlay tz'ok nloq'o' tq'anaq tzan tpaj k'onti'l waq'un n'oknoj. Ni ch'inwt ntumin» kyi te os kyi.

«Last a'ich. Yatz b'an wamiw b'ix galan chnab'lin wuky'i'l. Kyinb'ek'ayon awi'j. Per kyin'elal apuju' ti'j te tze' ja' yob'aminni. Ntons oxe'l nsi' waq'un yatz» kyi te



xhiky, txik tq'uma' te os kyi.

«Aa, pixon yatz qa tzajel asi' awaq'un wetz. Ntons ohtetz npuju' ti'j te tze'» kyi te os kyi.

Ntons te os ojaw tyob'a' tib'x b'ix te xhiky ojetq txik stzoqpi' kyi.



Ya ma tzul te xo'j, a te os yob'a'. A tetz ntza'jen te kjoj kyi. Te xo'j nq'ojin stzaj kanet, txik te'e' te os yob'a' tuq kyi.

«¿Tistil yatz a'ich yob'amich?» kyi te xo'j kyi.

«Pwes wetz nkyink'ulun ganar jweb' ketzal jun q'ij, nkyintza'jen kjoj» kyi te os kyi.

«Yatz k'onti'l nchk'ulun ganar jweb' ketzal jun q'ij. B'an mok' a'ich cha ma qet iq'i' awi'j. Te xhiky cha ma'tx stzoqppjik tetz junky'elky, ya k'onti'l qchi' ajna'l. A'ich at apaj. ¿Tistil ma tz'ok asi' awib' te tky'ixel tzan tjaw ayob'a' awib' ti'j tze'? Cha gan oqet nk'ulu' te tramp» kyi te xo'j kyi.

Per yatzun te xhiky ojetq tz'aj, b'an nchalaj b'an ntze'en tuq. B'an npajajan tzan tpaj k'onti'l oxik chi' tzan te xo'j kyi.

Ntons ntzani jun tpakb'alil ti'j te jun xhiky ky'i jun os b'ix tuky'i jun xo'j tzan qtze'en ti'j. A'ox nmankun ntzani.

## Jun Xhiky Ky'i Jun K'wa'l Q'ol

Bwen, pwes tzani tuj montañ, at tuq jun xhiky b'an list kyi. B'ix ax at tuq jun xo'j ky'i jun os. Te xo'j ky'i te os, b'an kyamiw tuq kyib' kyi.

Ntons jun q'ij te xo'j ky'i te os nkyeb'isun. Nkyequet wit'let tuj k'ul b'isuyon kyi.

Ntons oxik tq'uma' te xo'j te os ikxjani kyi: «Ajna'l oqtel qtzyu' te aj ma pikr xhikyni. Mejor oqtel qsi' jun tramp nim, puro q'ol iktza'x titzb'alil jun tal k'wa'l. Wokel qsu'u' nim q'ol ti'j b'ix wokel qsi' te tq'anaq» kyi te xo'j kyi.

Ntons, oqet k'ul'ulu' byenech te tramp iktza'x titzb'alil jun k'wa'l ky'i tq'anaq, kyaqil. Yaji eb'aj'ok ewan ti'j jun nim tze' kyi.

Yaji ya ma tzul te xhiky tetz nchalaj ti'j te k'wa'l wit'liqet twi' jun tros kyi. Per te aj k'wa'l tuq puro q'ol. Nya'tx jun k'wa'l b'an b'an'ax.

Ntons oxik tq'olb'e': «¡Je'ky! ¿Titza' atich?» kyi te xhiky kyi.

Yatzun te k'wa'l q'ol k'onti'l nky'ik tzaq'b'ik kyi.

Ntons te xhiky ojaw q'ojlik: «¿Tistil k'onti'l nky'ik atzaq'b'e'?» kyi te xhiky kyi.

Ntons oxik tjoto' jun trompad twitz te aj k'wa'l q'ol. Per komo puro lak', jun ele'x owok lak'et tq'ab' ti'j kyi.

«jKyintzaj atzoqpi'! jKyintzaj atzoqpi'!» kyi te xhiky kyi.

Per komo nya'tx b'an'ax k'wa'l ntons k'onti'l tuq nky'ik tzaq'b'ik.

Yaji te xhiky oxik tsi' junky trompad tq'o'tx te k'wa'l q'ol kyi. Tzan tpaj b'an lak' k'onti'l n'el.

Ntons te xhiky nsiky'in: «Yatz kaprichud a'ich. Yatz cha jun pikr b'ix tz'ak. jKyintzaj atzoqpi'! jKyintzaj atzoqpi'!» kyi te xhiky kyi.

Per k'onti'l n'el. Te xhiky ojetq jaw q'ojlik nim. Nxik txajo' tuky'i junky toq per ax nkaj lak'et. N'el tjuk'u' tib' tuky'i junky toq. Per k'onti'l n'el. Ax nkaj lak'et. Yaji oxik tpilq'u' ky'i twi'. Per k'onti'l oyak'jik kyi.

Ya ma kyepon te xo'j ky'i te os kyetz b'an nkyechalaj.

«Ajna'l qocho'yon qchi' xhiky. B'ix at jkalt» kyekyi kyi.

Kyetz nkyetze'en byenech kyi. Ajna'l te xhiky b'an nxob', per tetz list.

«Ajna'l okyinxe'l echi'. Per b'a'nalo. Per k'on kyinxik exon ja' at ky'i'x. Qa egan tzan tel ejolo' wi'j, qaltetz. Per k'on kyinxik exon ch'in wetz tuj ky'i'x» kyi te xhiky kyi.

Ntons kyi te os: «Pwes ntzani nim aq'unj b'ix te xhiky nchalaj. K'onti'l nxob'. Nya'tx galan ikja'n. Mejor intxik qxo'o' tuj te ky'i'x» kyi te os kyi.



«B'a'n» ky'i te xo'j ky'i.


Yaji oxik kxo'o' tuj ky'i'x. Per te xhiky tetz nsiky'in:  
«jK'on! jK'on! jK'on kyinxik exo'o' tuj te ky'i'x!» Per  
ojetq xik xo'o'.

Yaji kaj takun te xhiky. Yaji nijunwt ab'l tuq n'ok e'en  
te xhiky.

Ntons te xo'j ky'i te os b'an nkyechalaj tuq ky'i.

«Ajna'l k'onti'l te ma pikr xhiky. Ajna'l ma'tx naj»  
kyekyi ky'i.

Ntons te xo'j tuky'i te os nkyeb'ajchalaj tuq. «Ajna'l  
k'onti'l te xhiky. Ajna'l ma'tx naj.»



Te xo'j ky'i te os b'an nkyetze'en tuq. Per yaji derepent tjaw tze'enky te xhiky kyi.

«K'onti'l junky luwar mas tb'anil twitz te ky'i'x. Wetz b'an nkyinchalaj tzani» kyi te xhiky kyi. B'ix tetz njaw tze'en alegr.

Ntons te xo'j ky'i te os nkyeq'ojin. K'onti'l nnaj te xhiky b'ix k'onti'l kchi' b'ix k'onti'l kykalt.

B'an list tuq te xhiky. K'onti'l n'ok te kalt. Tb'ay owok lak'et ti'j jun k'wa'l q'ol per yaji oxik tzoqplet tzan tpaj b'an list tuq tetz twitz te os ky'i xo'j.

Bwen, pwes a'ox ntzani owok nchan ti'j te jun xhiky b'an list.

## Jun León Tuky'i Kaj Tor

Bwen, ntzani te aj oky'ik tuky'i jun león ky'i kaj tor kyi. Ntons kye tor ateqet tuq tuj kywab'l b'ix ketant tuq te k'ul kywe' ala'j. Kyetz kontent tuq ateqet b'ix kyamiw kyib' kykajil. Nkyeb'et tuq junch'in b'ix junch'in tuq nkyewa'an tuj kywab'l kyi.

Yaji dech nka'yin te jun león kyij'. Oxik laq'chet naql kyij' tzan kyqet tuq tkansa' kyi. Per yaji te león k'onti'l otnimsaj tk'u'j tzan tpon kxol tzan tpaj ky'ila'j kyb'et kye tor. K'onti'l eqet titza' tzan tpaj junch'in nkyeb'et. Ntons te león cha owaj t'jay per tzunx n'el tetz tk'u'j kyi.

¡Per kebaser! Tuj junky q'ij ejaw q'ojin te kykajil tor b'ix yaji ja'chq oxik ksipa' kyib'. Yaji ya ma tzulky te león e'el kyetz, tetz oje chalaj kyi.

«Aa pwes wetz nkyinchalaj ajna'l tzan tpaj kyexe'l nchi» kyi ikxjani kyi. «Ajna'l kyinnojel. Ma'tx qet kypawa' kyib'» kyi kyi.

Ntons yaji oxik te león kansal kyetz ja' ojetq tuq kyepon junjun. ¡Te león kebal titza' kyqet tkansa' junjun tor! Tb'ay oqet jun b'ix yaji oqet tkansa' tkab'i' b'ix yaji otzyet toxi'. Yaji te león n'ok tuq laq'chet ti'j te tkaji' tor b'ix

yatzun te tor txik te'e' te león, oxob' b'ix oxik tanim tuj b'is kyi.


«¡Ay! Ajna'l wetz okyinkamel. Nya'tx galan oj qjaw q'ojin tzan tpaj nxik qsipa' qib' ja'chq junjun. Je'ky titza'alo ojaw q'ojinna. Nya'tx iktza'wit uk'le' qib' qkyaqil, k'onti'ltal ma qokamika tzan te león. Per ajna'l okyinkamel wetz» kyi te tor kyi.

Ntons yaji te león oxik lipan ti'j te tor b'ix onoj tk'u'j byenech kyi.

«Ma'tx kyinkamb'an nchi' ajna'l. Ma'xkix kyeqet kye tor witza'» kyi te león kyi.

Astilji nya'tx galan qa nqob'et qchukel tzan tpaj qa at jun qajq'oj nqoqetkix titza'. Mejor qob'et ky'ila'j qb'et b'ix nlay qoqet q'oji'. Ikji b'a'n tzan jkolon qib'.

Bwen, a'ox ntzani aj oky'ik kyi'j kye kaj tor tzan te león.





## Tidi' Oxik Te'e' Jun Tx'ya'n Tuj A'

Bwen, ntons jun el at tuq jun tx'ya'n b'ix yaji at tuq jun pedas xhchi' tuj stzi' kyi. Ntons oqet txima' ikxjani kyi: «Te chib'j oxel win te nchi' njay» kyi kyi.

Ntons yaji oxik. ¡Per kebaser! Nb'et tuq tajsik jun puente b'ix te a' nslek'ab'an tuq b'ix dech oqex tka'yi' junky tx'ya'n tuj a' ax jaka' jun pes xhchi' tuj stzi' kyi. Per nya'tx junky tx'ya'n b'an'ax tuq sinoke axkixji tzan tpaj te a' nslek'ab'an iktza' despej. Tib'x nqex te'e' tib'x per k'onti'l owel tniky' qa ajixk tetz. Tetz tuj ttab'l qa junky tx'ya'n ky'i junky pedas chib'j jaka' titza' kyi.

Ntons yaji owel tq'ajab' ti'j te junky pedas chib'j aj nqex te'e' tuj te a'. Yaji oqex lipan kanol te junky pedas te chib'j kyi. Ya tetz xhchi' aj jaka' tuq titza', dech oxik stzoqpi' tuj te a' b'ix owex iqb'e' tzan te a' kyi.

Ntons yaji k'onti'l tuq te xhchi' nich'inwt. Ntons owaj tjay b'ix k'onti'l oxik tniky'b'e' te xhchi' tzan tpaj owel tq'ajab' ti'j junky pedas chib'j. Bwen, ntzani nmankun te aj oky'ik ti'j te tx'ya'n aj owel tq'ajab' ti'j te junky pedas chib'j.

## Txq'an Kxhlan Worte'

### B'ix Txq'anky Flake'

Bwen, jun el tuj jun amaq', at tuq jun tjay kxhlan b'ix ate' tuq txq'an kxhlan Worte' ky'i txq'anky flake' kyi. B'ix kye kxhlan Worte' nkyexmayin tuq kyij' kye kxhlan flake'. B'ajq'ij b'ajq'ij nkyexmayin tuq. Nxik kyq'uma' tuq ikxjani kyi: «Puro b'aq a'ix. Puro plum a'ix. Puro potx a'ix. Cha nkxweqejla'. K'onti'l te ebalor tzan eb'et. Cha ch'inky ekamik. Nch'uyujla' eje'» kyekyi kyi.

Ntons b'ajq'ij b'ajq'ij nkyexmayin tuq kyij' kyi. Per jun q'ij dech opon te kyajawil iq'il xhchi' kxhlan b'ix owel tjoyo' kye aj Worte' kyi. Oje kyeweq'un ktzyet per nimod, exik iq'i' tzan tpaj Worte'. Cha gan nkyexmayin tuq kyij' kye flake'.

Ntons kyna'oj kykamiky b'ix opon tuj kynab'l qa ojetq pon or tzan kykamik tzan tpaj ya kyetxk tzan tel mixo' kyij' tzan tpaj Worte'. B'ix owel kyq'ajab' ti'j kswert kye ch'uyuje'.

Bwen, a'ox ntzani te aj oky'ik kyij' kye txq'an kxhlan Worte' aj nkyexmayin tuq kyij' txq'anky kxhlan flake'.

## Jun Txil Tuky'i Jun Sanik

Bwen, ntons ntzani jun tpakb'alil ti'j jun txil tuky'i jun sanik.

Ntons at tuq jun sanik. Tetz n'aq'unan tuq nim kyi, tq'awen n'aq'unan tzan tok xhchimo' twe' tuj tjay kyi. B'ix yaji tzaj te jun txil, oxik tq'uma' te sanik ikxjani kyi: «Bwen, ¿token yatz k'onti'l nxhch'ojlan? ¿K'onti'l pe' nchsiktik? Mejor qalan wuky'i'l. Qo'o xb'ak'on tuj amaq'» kyi te txil, txik tq'uma' te sanik kyi.

Ntons te sanik k'onti'l ky'ik stzaq'b'e'. Cha nky'ik xhcha'o' tyol te txil b'ix cha tq'awen taq'unan tetz kyi.



Yaji ꞑkebaser! Dech oxik tzoqpi' te q'aq' tuj k'ul b'ix omankun twe' te txil kyi. Per yatzun te sanik ketant tetz twe' tuj tjay kyi.

Yaji otzaj junky'elky te txil tuky'i te sanik.

«Pwes najsaj. Qanq at ch'in nwe' awuky'i'l. N'el nk'u'j b'ix oje mankun wetz nwe' tzan te q'aq'. Tzajel awoye' ch'in nwe' tzan tpaj wetz k'onti'l nwe'» kyi te txil ikxjani kyi.

Ntons te sanik oxik tq'uma' te txil: «Pwes yatz tzan tpaj cha ky'aj a'ich b'ix astilji k'onti'l awe'. Pax aq'unal waq'un tb'ay b'ix yaji oxe'l nsi' awe'» kyi te sanik kyi.

Ntons te txil k'onti'l oxik aq'unon tzan tpaj ky'aj. Yaji oxik qanil twe' ky'i txq'an ky' txkup. Per yatzun te sanik ketant tuq tetz twe'.

A'ox tzani nmankun tidi' oky'ik ti'j te txil.

## Te Xkulkuwix'

### Aj Tgan Tuq Tok Palom

Bwen, te ntzani aj oky'ik ti'j jun xkulkuwix' kxol txq'an palom. At tuq jun xkulkuwix' ky'i txq'an palom kyi. Kye palom at tuq jun kyjay galan twi' jun iglesy per yatzun te xkulkuwix' k'on tgan tuq tetz tjay tuj txaq tze' kyi. Owel tq'ajab' ti'j kyjay kye palom, astilji tgan tuq tzan tpon najan kxol kye palom kyi. Per komo chuktky tetz ti'j, kye palom k'onti'l owox kyk'amo' kxol. E'okten palol tetz tzan k'on tz'ox najan kyuky'i'l kyi.

Ntons te xkulkuwix' owokten ximayon titza' owokel kxol kye palom kyi. Yaji owok tsi' teb'l ti'jx tuky'i jun teb'l saq tzan tok iktza'x palom kyi.

Yaji oxik b'ix opon kxol kye palom. B'ix komo kyetz ky'ila'j tuq kyb'et, k'onti'l owel kyniky' ti'j te xkulkuwix' kyi.


Per yaji te xkulkuwix' onaj ttab'l ojaw oq'. Ntons yaji kye palom owel kyniky' ti'j tetz chuktky tuq tetz tz'oq' b'ix yaji e'aq'ik tzan tqet kypalo' junky'el kyi. B'ix owex kylajo' b'ix eb'aj'oknoj kyaqil palol tetz kyi.



Ntons te xkulkuwitx' owex b'ix owoqik b'ix opon tuj junky luwar. B'ix yaji opon junky'elky kxol palom. Per yaji kyetz owel kyniky' ti'j tetz nya'tx jun b'an'ax palom tuq. Ntons e'okten palol tetz b'ix yaji te xkulkuwitx' owoqik tzi. K'onti'l ja' ok'amet te xkulkuwitx'.

Yaji owel tniky' te xkulkuwitx' meyor tzan sten kontent ti'j tjay tuj txaq tze' b'ix ax ti'j teb'l ti'jx b'ix nya'tx galan tzan tel tq'ajab' ti'j tjay te junky.

A'ox ntzani aj oky'ik ti'j jun xkulkuwitx' kxol kye palom.



## Jun Chap Ky'i Jun Kyej

Bwen, at tuq jun nim soch b'ix ketant tuq ab'j tzi. Te tzi ketant kyjay kye chap.

Ntons yaji opon te jun kyej uk'al a' b'ix atqet tuq jun chap naql stzi' te a' kyi. B'ix te kyej dech oqet txajb'e' tzelti'j te chap ky'i toq. B'ix te chap, jun ele'x oqet pax tzelti'j tzan te kyej kyi. K'onti'l ob'antik tb'et te chap tzan tpaj tqetlen xajb'e'. B'ix ojaw wayun. Oje tz'oq' tzan taq'ikal tzan xhcho'onat tzelti'j kyi.

Yaji derepent tpon te jun ajaw. «¿Ti' n'awo'je'?» kyi te ajaw kyi.

«Wetz nkyin'oq' tzan taq'ikal tzelwi'j» kyi te chap. «Ma tzul jun kyej uk'al a' b'ix atinqet tuq wetz stzi' te a' b'ix komo wetz ch'i nikit a'in, k'onti'l ma kyinget te'e'. Yaji dech ma kyinget txajb'e' ky'i tq'ab'. Ajna'l b'an paxal tzelwi'j tzan te kyej» kyi te chap, txik tq'uma' te ajaw kyi.

«Last a'ich» kyi te ajaw. «Mejor tzan atzaj wuky'il. Wetz b'a'n kying'anan, ochtel nq'ana'» kyi te ajaw kyi.

«Per nlay b'antik nb'et» kyi te chap kyi.

«Otxe'l wiqa' tzelwi'j.»

«Pwes b'a'n. Pixon atz qa oqtel aq'ana' tzelwi'j» kyi te

chap kyi. B'ix yaji oqet q'ana' te chap kyi.

«B'a'nx ch'in nna'o' ajna'l. Mejor ma kyin'aj njay k'ulul ti'chq ti'j te kyej» kyi te chap kyi.

«Pwes b'a'n. Pax atz ajay. Ajna'l ma chb'antik» kyi te ajaw kyi.

Yaji opon tjay. Yaji derepent tpon te kyej junky'elky uk'al a'. Yatzun te chap atqet tuq stzi' te soch. Yaji txik te'e' b'ix ya te kyej ikja'n tuq tpon uk'al a' junky'elky. Ya ma pon te kyej b'ix derepent tex lipan te chap ti'j talq. Te kyej derech ojaw meltz'jikky tzan txob'al tzan te chap ojetq tz'ok tunlet ti'j talq. B'ix owaj meltz'jikky b'ix derech oxik txon tib' tuj jun xaq kyi. Derech okyaqon max txe' xaq kyi.

Ya tkyaqon txe' te xaq, okamik te kyej. Per yatzun te chap, k'onti'l okamik. Ojatz lak'an xtx'u'kele' te xaq. B'ix ojakul tetz tjay. B'ix yaji kontent ojetq kaj. K'onti'l onaj kyi.

«Ajna'l aji ma'tx naj. Wetz k'onti'l ma kyinnaj. Wetz ma'tx kyin'ul njayky» kyi te chap kyi.

Bwen, a'ox tzani nmankun aj oky'ik ti'j te jun chap tuky'i jun kyej.

=

## Jun Kyej Tuj Montañ

Bwen, at tuq jun kyej tuj montañ b'ix oqet tala' jun tal kyi. B'ix ketant tuq txkup nkyechalaj tuq ti'j te tal kyej kyi.

Nkyeyolin kye txkup: «Tb'anil te tal kyej» kyekyi kyi.

N'ok ktze', pen tuq nwa'let, nlu'lun tuq toq kyi. Per yaji b'antik twa'let byenech. B'ix ya te alon n'el tleq'u' ti'j tal. Ntons te alon nchalaj tuq ti'j tal kyi.



B'ix eb'ajtzej kye txq'anky txkup tuj k'ul oxik kyqani':  
«¿Ti'tzun teqel awal?» kyekyi kyi.

«Pwes ch'i tman» kyi te alon kyi.

«Tb'anil» kyekyi kye txkup kyi.

Te tal kyej nky'ib'. N'ok lapet ti'j tnan. Te tnan nxik txnaq'tza' tetz b'ix ja'chq nkyexik. Te tal n'ok tsiqo' kyaqil k'ul ky'i ub'ech b'ix nsaqchb'ilan tuj k'ul kyi.

Jun q'ij owoknoj junky tal kyej twi' te tuky'i'l. Kyetz nkyesaqchb'ilan. Derepent txik kcha'o' jun npunk'an tel b'ix eb'ajxob' kyi.





«¿Ti' tb'ajlen nini? Ajna'l qonajel» kyekyi kyi.

«Qo'oqik» kyi te alon, oxik tq'uma' te tal kyi.

B'ix eb'ajxik oqik kyetz kyuky'i kyaqil txkup tuj k'ul.

Ya ma kyepon kyjay, tzaj te alon, oxik tq'uma' te tal ikxjani kyi: «Te aj npunk'an tzan kye xjal. Kygan tuq tzan jqet kykansa'. Luwew ma qo'oqik tzan k'on qnaj tzan te kyub'l tzan tpaj kyetz kygan tzan qxik kchi'» kyi te alon kyi.

Ntons yaji oky'ik kab'e' qya' b'ix jun q'ij q'eqo' owel twatl te kyej. A jun che'w tuq tzan tpaj ojetq tuq qet nim sb'a'k. Oponaj te kywe' tzan te sb'a'k, cha e'okten wa'il teb'en tze' tzan te wa'ij. Oje kyeb'isun ti'j kywe' tzan tpaj ni ch'inwt te k'ul. Ojetq naj kyaqil. B'ix jun q'ij derepent owoknoj jun pedas txax'x k'ul kywitz. Eb'ajchalaj b'ix e'okten wa'il te k'ul. Nkyewa'an, nkyechalaj, ojetq tz'oknoj te kywe'.

Nkyewa'an tuq txik kcha'o' jun ub'l tel punk'an b'ix eb'ajxob'.

«¡Pax! ¡Pax! ¡Pawoqik kared!» kyi te alon.

B'ix te tal oxik oqik. Max tjay opon. Ya ma tz'aj te'e', k'onti'l lapik tnan.

«¿Ja' ma'tx kaj nnan?» kyi te tal kyej kyi.

¡Kebaser! Te tnan ojetq tuq kamik. Yaji derepent owoknoj jun ma tij kyej twitz kyi.

«Ajna'l ochb'etel achukel. Ikxji ochnaq'etel kyeb'a'» kyi

te ma tij kyej kyi.


«Bwen» kyi te tal kyej.

Ya ma tz'el laq'chet te sb'a'k, oje tuq ky'ib' te k'ul. B'ix eb'ajchalaj kkyaqil kye txkup tuj k'ul. Ketant tuq te kywe' kyi.

Ntons komo ya ojetq ky'ib' te tal kyej, tgan tuq jun twi'. Yaji tzaj te aj twi' kyej aj ob'ajsaqchb'ilan tuky'i'l junab'i. Ntons eb'aj'ok junan kyi.

Yaji eb'ajqet kab'e' ch'i tal tman b'ix nkyeb'ajchalaj kye alon kyi'j kyal. B'ix kkyaqil kye txkup tuj k'ul eb'ajxik e'el kye tal kyej b'unlike' tuq tuj kyq'u' b'ix nkyeb'ajchalaj tuq kyi'j kyi.

Bwen, a'ox tzani nmankun tidi' oky'ik ti'j te jun tal kyej.





## Jun Ichan Tuky'i Jun Loxh

Bwen at tuq jun ichan oqtxi' kyi, b'ix ax at tuq jun txu'jel. Te ichan oqex tawa' txq'an tkojoj kyi. B'ix komo at tuq b'an nim xtx'o'otx' per cha ch'in oqex tawa', ya te txq'an ky k'onti'l oqex tawa' tzan tpaj ky'aj tuq te ichan kyi.

Ntons aj tpon tyemp tzan tel tb'oqo' ti'j te tkojoj, oxik b'oqol. Yaji owul jun loxh, oqet lipan tuky'i'l. Per te loxh b'a'n tuq yolin kyi. Yaji tzaj te ichan, oxik tq'uma' tetz te loxh ikxjani kyi: «Yatz galan aswert iq'i' awitza'. Nya'tx kwest tzan awa'an b'ix yatz puro chib'j achi'» kyi te ichan te loxh kyi.

«Qa agan tok awen twitz, intqet qky'exb'e' qib' oxo q'ij aber qa galan nky'ik wi'j» kyi te loxh kyi.

«Bwen. Kyinxel wetz ja ntxik atz» kyi te ichan kyi.


«Bwen. Pax naji. Tuj oxo q'ij qojunayon tzani» kyi te loxh kyi.

Ntons yaji te loxh owok aq'ik aq'unon b'ix owokten b'oqol ti'j te kjoj kyi.

Ya te xuj opon swal talmwers kyi. Tetz tuj ttab'l qa tichmil tzan tpaj te loxh atok xhchump te ichan ti'j. Yatzun te xuj oxik tswa' talmwers kyi. Aj tmankun twa'an te loxh,

tzaj te xuj oxik tq'olb'e' te loxh tzan tpaj tetz tuj ttab'l qa tichmil tuq kyi.

«¿Token yatq qusquj awi'jni? Mejor oxhch'ichiyon» kyi te xuj kyi.



«Per nlay. Mejor max oj telb'ajyun ti'j te kjoj» kyi te loxh kyi.

Ntons ya ma tz'exnaj te q'ij, owaj te loxh tuj jay b'ix owokten wa'il te qale'. Puro chib'j te tb'el twe' kyi. Tuj junky q'ij owelb'aj ti'j te kjoj. Te loxh owok tsi' tq'awen tzan tb'oqon b'ix jun rat telb'aj ti'j te kjoj titza' kyi. Ya ma tz'aqet toxin q'ij, wul te ichan junky'el kyi.

«Ma'tx xhch'ul» kyi te loxh te ichan kyi.

«Pwes ma'tx» kyi te ichan kyi.

«Pwes ¿nojnaq pe' ak'u'j?» kyi te loxh kyi.

«Pwes, nya'tx» kyi te ichan kyi.



«Yatz b'an ajun aky'aj. Wetz at tuq nchi' tuj ajay b'ajq'ij. Puro chib'j tb'el nwe' b'ajq'ij. Wetz nb'antik awaq'un witza'. Pax ajay ky'i axu'jel. Per k'onti'l tzan txik aq'uma' tuky'i axu'jel tidi' qtrat ma tz'ok qitza'» ky'i te loxh ky'i.

Yaji tzaj te loxh oxik lipan twitz ka'j b'ix oxik tiqa' jun pedas chib'j puro xhchi'jel ky'i.

«Last wetz a'in. K'onti'l ma tz'oknoj nchi'» ky'i te ichan ky'i.

Ya junky iwitq oxik tq'uma' te txu'jel.

«Pwes wetz kab'ije oxwa'q wotzqila'tz jun luwar laq'chik. Wetz cha qet nky'ixpu' wib' tuky'i te loxh» ky'i te ichan, txik tq'uma' te txu'jel ky'i.

¡Per kebaser! Tuj tjweb'i' q'ij onaj te ichan ky'i. Onaj tzan tpaj txiklen tq'uma' ti' tuq tetz strat owok tuky'i te loxh ky'i.


Bwen, a'ox ntzani tidi' oky'ik ti'j te jun ichan ky'aj tuky'i jun loxh.



## Jun Itx' Tuj K'ul Tuky'i

### Jun Itx' Tuj Amaq'

Bwen, at tuq jun itx' tuj k'ul b'ix nikit jul te tjay kyi. Tetz tq'anaq nya'txix galan, komo tuj k'ul at. Nya'tx nim tetz taq'un. N'aq'unan jun rat, yaji junky rat n'okten saqchb'ilon tuky'i tamiw kyi. Tetz b'an kontent at, k'onti'l tidi' tuq ti'j tuj k'ul kyi.



Tetz at tuq jun tprim kyi. Tzaj te tprim: «Yatz nya'tx galan ja' atich tuj k'ul. K'onti'l tidi' tb'anil nxik awan. Wetz njay tuj amaq', at galan tb'anil tb'el nwe' tzan tpaj wetz njay tjay jun q'inon xjal. Tb'anil tb'el nwe'. Puro queso, puro pan, puro pastel, puro chib'j, mantek, lob'j, b'ix k'onti'l waq'un. Wetz cha nwiyo' oj tul iq'i' tzan te q'inon xjal» kyi te tprim kyi.

Otzajji, oxik tq'uma' ikxjani te tprim aj atex tuj k'ul: «Pwes patzaj wuky'i'l tjay te q'inon xjal tuj amaq'» kyi te aj tuj amaq' itx' kyi.

Ntons ya ma kye pon tuj amaq', oxik tq'uma' ikxjani kyi: «A te jay nini. Tb'anil b'ix at tidi'chq aj yatz agan. At queso, at pan» kyi te itx' te tprim kyi.

«Puro tb'anil kyaqil. Byenech ajay» kyi te itx' tuj k'ul, owaj stzaq'b'e' kyi.

Ntons e'okten wa'il, kontent ate'. Nkyewa'an te kywe' kyi. Derepent txik tq'uma' te itx' tuj amaq': «¡Xnatzi'! ¡Xnatzi'! ¡K'on chwululun!» kyi te aj tuj amaq' itx' kyi.

«¿Tistiltzun?» kyi te itx' aj tuj k'ul kyi.

Yaji e'oqiknaj b'ix e'ox tuj kyjul kyi.

«¿Tistiltzun?» kyi te itx' aj tuj k'ul kyi.

«Aa pwes, at jun wich b'ix nqoxik xhchi'. Cha ntzaj'oq lipan qi'j» kyi te aj tuj amaq' itx' kyi.

«¡Uy! Ntons nya'tx galan atz tuj ajay» kyi te itx' aj tuj k'ul kyi.

«¡Galan! ¡Tb'anil! Ma'tx xik te wich ajna'lni. Qowa'an junky'el» kyi te aj tuj amaq' itx' kyi.

B'ix e'okten wa'il kontent junky'elky. ¡Per kebaser! Derepent: «¡Xnatzi'! ¡Xnatzi'! Kyeb'a' qoxe'l tzan k'on qxik e'e' junky'elky» kyi te aj tuj amaq' itx' kyi. Ntons e'oxnaj kared tuj jul.

«¿Tistiltzun qoxe'l ewayon junky'el? ¿Tzul junky'el te wich?» kyi te itx' tuj k'ul kyi.

«Nya'tx. Ajna'l jun tx'ya'n ma'tx tzul» kyi te aj tuj amaq' itx' kyi.

«¿Ti' ntk'ulu' te tx'ya'n qi'j?» kyi te itx' aj tuj k'ul, nxik tqani' kyi.

«Qa ma qotzaj te'e', ntzaj lipan qi'j. Jun tx'a'on nqoxik xhchi» kyi te aj tuj amaq' itx' kyi.

«¡Uy! Nya'tx galan tuj awamaq'» kyi te itx' aj tuj k'ul kyi.

«Galan tzani. Ma'tx xik te tx'ya'n. Mejor qowa'an junky'el. Tzani galan tb'el qwe'» kyi te aj tuj amaq' itx' kyi. Ntons e'ex junky'el.

«Aa, ntzani galan te jun pedas te queso, oxe'l qwa'a' junky'el» kyi te itx' aj tuj k'ul.

«¡K'on, k'on! Te aji nya'tx galan tzan txik qwa'a'. Tetz nini atqex tuj tramp. Qa ma xik qyak'u' qokajel q'a'et tuj» kyi te aj tuj amaq' itx' kyi.

«¿Tistil tzunji?» kyi te itx' aj tuj k'ul kyi.

«Tetz nini nkaj qalq tjaq' te tramp» kyi te aj tuj amaq' itx' kyi.

Yaji te itx' aj tuj k'ul oxik oqik tjay kyi.

«Mas galan wetz njay tuj k'ul. Tzani k'onin te nwe' per k'onti'l tidi' nky'ik wi'j. Nkyinb'et, nkyinxb'ak'an tjaq' te k'ul. ¡Mejor tzani kyinteyon, nya'tx tuj nim amaq'! Ajna'l kyinteyon tuj k'ul kontent» kyi te itx' kyi.

Ntons ikxji oky'ik ti'j te jun itx' aj tuj k'ul. Tb'ay tgan tuq tzan txik tuj jun nim amaq'. Per mejor, tetz tgan tuq mas tuj k'ul twitz te tuj amaq'. A'ox ntzani.





## Jun Ichan Tuky'i Jun Xuj Xo'j

Te ntzani aj oky'ik ti'j jun ichan aj nxmoxon tuq ti'j jun xuj xo'j tuq.

Ntons at tuq jun xuj kyi. Per nya'tx xjal kyi. N'ok tuq xo'j.

Ntons jun q'ij oxik q'a'il. Yaji exik xhcha'o' txq'an karner nkye'oq' tuq tuj joko'j tuj muj. Yaji owel tiq'i' tam ky'i tkolob' kyi. Te tam tuky'i tkolob' tuky'i tq'awub' ekaj tk'u'u' tjaq' ky'im kyi. Yaji oxik te'e' qa at ab'l nkyeka'yin ti'j kyi.

Per at tuq jun ichan nxmoxon tuq ti'j. Ya te ichan cha oqet ewan tuj ky'im. K'onti'l oxik tyek'u' tib' twitz te xuj kyi.

Ntons nxik te'e' k'onti'l ab'l nkyeka'yin tuq ti'j kyi. Yaji n'ex oxo piliq' tajsik te ky'im kyi. Yaji ya ma jaw wa'let, n'el tkyito' ti'j, jetq tuq tz'ok jun ma b'i'xh xo'j kyi. Per ya ma qex qetl, jun rat tkyaqon tuj joko'j tuj muj. Yaji ntzyetnaj jun karner titza' kyi. Njaxnaj xtxon ti'j talq, per nka'yin tuq te ichan aj nxmoxon tuq ti'j kyi. Oxik te'e' derech opon tin tjay.

Ya ma pon tjay okaj tsi' te karner tjay. Yaji omeltz'jik

iq'il tuq te tam tuky'i tkolob' b'ix wetz tiq'i' tq'awub' tjaq' ky'im kyi. Exik ten qa k'ontile' kye xjal, yaji e'ok tsi' tq'anaq, yaji oky'itz q'a'il kyi.

Ya te ichan aj nka'yin aj nxmoxon tuq ti'j, ya ma kanon ti'j oxik tq'uma': «Bwen, ¿nchq'a'an?» kyi te ichan.

«Tzun» kyi te xuj.

«Aa bwen. Ajna'lni wajetz asi' ntumin nimod. Yatz a'ich xjal per txkup pena'l a'ich. Qanq b'a'n inkyi wetz nkyinxmoxon tuq awi'j. Per yatz txkup pena'l a'ich. Pwes ajna'lni ochkajel nswa' per intajtz asi' ch'in ntumin» kyi te ichan tetz kyi.

«Nlay tz'aj nswa' atumin tzan tpaj wetz ngan a'ich te wichmil» kyi te xuj kyi.

«Per wetz nya'tx ngan a'ich ajna'l tzan tpaj yatz a'ich xo'j» kyi te ichan kyi. «Intajtz asi' ntumin. Si no pedas oxhch'elal witza' tuky'i nmachit tzan tpaj yatz a'ich xo'j» kyi te ichan te xuj kyi.

«Pwes nlay tz'aj nsi' atumin tzan tpaj wetz ngan a'ich te wichmil» kyi te xuj junky'el kyi.

«Wetz nya'tx ngan a'ich ajna'l. Ajna'l yatz wajetz asi' ntumin» kyi te ichan aj taj tqani' stumin tuky'i te xuj kyi.

Yaji oxik tq'uma' kye txq'ankey ichan aj nkyexmoxon tuq ti'j te xuj kyi.

«Ajna'l k'on tz'ok qxmoxo'. Xo'j aj nini. Wetz tuj nnab'l qa tk'wa'al xjal tuq. Kyetz xo'j penal ninije' tuj

kyjay tzan tpaj tzi ma pon tiq'i' jun karner tuj kyjay» kyi  
ikxjani, txik tq'uma' kye txq'ankey tamiw kyi.

«Aa qaltetz naji. Intkajten xhchukel» kyekyi kye tamiw  
kyi.

Per te xuj oje tz'oq' taj tqani' stumin te ichan kyi.

«Bwen ajna'l pakaj b'eyx» kyi te ichan, kaj tkawi' te xuj  
kyi.

Ntons yaji te xuj okaj xhchukel. Ya te karner oqet  
kykansa' te xuj ky'i stat. Oxik kykalti' kkyaqil kyetz kyi.  
Ya ma kye tzaj kye besin eqet kylamo' byenech kyalo'  
karner tzan tpaj at tuq te xo'j. Ya k'onti'l eb'ajxwa'q  
pastoriyon tuj joko'j tuj muj tzan tpaj nkyexob' tuq. «At  
txkup» kyekyi kyi.

Bwen tzani nmankun aj oky'ik oqtxi' tuky'i jun xuj kyi  
per xo'j tuq kyi. A'ox ntzani.







## Jun Q'opoj Tuky'i Jun

### Tb'i'ixh B'ix Jun Xo'j

Bwen, at tuq jun q'opoj nxik e'el tb'i'ixh b'an yab' tuq kyi.

Kyi te alon tetz ikxjani kyi: «Pax e'el ab'i'ixh. Wetz nim waq'un. Astilji nlay b'antik nxik e'el tetz. Yatz a'ich q'opoj, pax e'el tetz. K'onti'l atz awaq'un» kyi te tnan tetz kyi.

«Bwen» kyi te q'opoj kyi.

B'ix oxik tiq'i' tb'e'eq tuky'i twe' tuky'i tlo' jos tuky'i tkape te tb'i'ixh atqex tuq tuj tb'e'eq kyi.

«Pax ajna'l. Per k'on chqet yolin tuky'i nijunwt tuj b'ey. Derech otxe'l» kyi te alon kyi.

«Bwen» kyi te q'opoj.

Yaji oxik. Te b'ey derech tuq n'ex tjaq'tzaj. Yaji dech woknoj jun xo'j twitz kyi. Kyi te xo'j ikxjani kyi: «¿Ja' ma txik?»

«Wetz ma kyinx e'el nb'i'ixh. Tetz yab'» kyi te q'opoj kyi.

«Bwen. Per ¿tidi' atqex tuj ab'e'eq?» kyi te xo'j kyi.

«Pwes twe' nb'i'ixh tuky'i tkape b'ix tlo' jos» kyi te q'opoj kyi.

«¿Ja' atqet tjay ab'i'ixh?» kyi te xo'j.

«Max tjaq'tzaj» kyi te q'opoj, txik tq'uma' te xo'j kyi.

«Aa bwen. Txik awiq'i' ch'in tremey yerbabwen. Tzani ketant» kyi te xo'j kyi.

Ntons oxik tiqa' te q'opoj tremey tb'i'ixh. Ya te xo'j nxiknaj karedin tb'ayon twitz te q'opoj. Luwew opon te xo'j tjay tb'i'ixh te q'opoj kyi.

Aj tpon te xo'j, owox tsk'onk'a' tlamelul jay kyi. Ya ma tzaj te b'i'ixh, oxik xhcha'o' ikxjani kyi: «¿Ab'lichtzun?»

Yaji oxik stzaq'b'e' te xo'j: «A'in wetz b'i'ixh» kyi te xo'j ikxjani kyi.

Tzaj te b'i'ixh, k'onti'l owel tniky' ti'j qa xo'j tuq. Tzaj te b'i'ixh, wox tjaqo' tlamel. Tuj ttab'l tetz qa tb'etx'el tuq. Ya ma tz'ox tjaqo' tlamel, n'oxnaj lipan te xo'j ti'j te b'i'ixh. Nqetnaj tk'alo' tq'ab' ky'i toq b'ix n'oknaj tmaqo' stzi' te b'i'ixh tzan k'on tjaw siky'in kyi. Yaji owox tsi' te xo'j tq'anaq te b'i'ixh ti'j b'ix yaji oqet witan tuj twatub' te b'i'ixh kyi. Ntons ya ma pon te q'opoj e'el tb'i'ixh, oxik te'e' tb'i'ixh nwitan. Per nya'tx tb'i'ixh sinoke xo'j tuq. Per yatzun te q'opoj k'onti'l owel tniky'.

Oxik tlima' te q'opoj tb'i'ixh: «Tza'n b'i'ixh.»

Yaji ya ma tz'ok te'e', oxik tqani': «¿Tistil limaq awitzni b'i'ixh?»

«Pwes tzan axik we'e' byenech» kyi te xo'j kyi.

«Aa, b'ix ¿tistil asoq' nimni b'i'ixh?» kyi te q'opoj kyi.

«Pwes tzan axik nsiqo' byenech» kyi te xo'j.

«Aa ¿b'ix tistil twitz awe' limaqni b'i'ixh?» kyi te q'opoj.

«Pwes tzan axik nchi'» kyi te xo'j kyi.

B'ix oxiknaj lipan tajsik te q'opoj. Per te q'opoj owetznaj oqik max tjay te jun tkyan owa'let kyi.

Tzaj te tkyan, n'etznaj tuky'i tmachit b'ix ojaw tlajo' te xo'j tuky'i tmachit. Okanon ti'j te xo'j b'ix oxik stzoqpi' tmachit ti'j talq te xo'j kyi. Yaji okamik te xo'j. Yaji k'onti'l k'ulun joder ti'j te q'opoj kyi.

Te q'opoj oje chalaj. Oxik junky'el tjay te tb'i'ixh. Ya ma pon, tzunx k'alo' tuq te tb'i'ixh. Yaji oxik stzoqpi' tq'ab' tuky'i toq ax stzi' kyi.

Yaji nchalaj te tb'i'ixh tzan tpaj ojetq tnaj te xo'j. Ya k'onti'l eb'ajxik tiq'i' talo' kxhlan. Ketant tuq te kxhlan nkyenaj tuq tzan te xo'j. Te b'i'ixh nb'isun tuq ti'j talo'. Tzan tb'isb'en oqet yab'tik. K'onti'l tuq talo'. Per yaji ob'antik te b'i'ixh tzan tpaj oje tnaj te xo'j. Ya nlay kyeb'ajxik iq'i' talo' kyi.

Bwen, a'ox ntzani aj oky'ik ti'j jun q'opoj tuky'i tb'i'ixh tuky'i jun xo'j. B'ix tb'anil tzan tpaj te xo'j owok tswa' tq'anaq te b'i'ixh ti'j tzan tqet tiq'i' te q'opoj per yaji oqet kansa'. Astilji, ya k'onti'l tzan txik tin mas talo' kxhlan te b'i'ixh. A'ox ntzani.




## Ox Chib Tuky'i Jun Kulelj

Bwen, jun el ate' tuq ox chib kyi, jun nim tuky'i junky saqamb'oj tuky'i junky ch'i nikit kyi. Yaji eb'ajpon stzi' jun nim a'. Nim te a', k'onti'l ob'antik kky'ik tuj te a'. Yaji ti'j jun utz eb'ajky'ik kyi.

B'ix atqet tuq tajawil te utz, jun kulelj tajawil kyi. Yaji oky'ik tb'ay te tal chib ti'j utz. Aj tky'ik ti'j te utz tzaj te kulelj, oxik xhcha'o' te tal chib nb'et ti'j tutz kyi.

«¿Ab'l nb'et ti'j wutzni?» kyi te kulelj, txik siky'in kyi.

«A'in wetz» kyi te tal chib, kyeb'a' oxik tq'uma'.





Tzaj te kulelj: «Ajna'l otxe'l nchi'» kyi kyi.

«Aa wetz k'on kyinxik achi'. Ch'i nikit wetz a'in.

Nya'tx nim chib'j wetz wi'j. Tzul junky werman, tetz ketant chib'j ti'j. Mejor xe'l achi' tetz» kyi te tal chib kyi.

«B'a'n naji. Ntons pax wa'il junky palaj wutz» kyi te kulelj kyi.

Yaji oky'ik te junky saqamb'oj chib. Ya ma ky'ix b'et te chib ti'j utz, ya te kulelj oxik xhcha'o' tky'ik te saqamb'oj chib kyi. Oxik wayun te kulelj kongan: «¿Ab'l nb'et ti'j wutzni?» kyi kyi.

«A'in wetz» kyi te saqamb'oj chib kyi.

«Ajna'l otxe'l nchi' atz» kyi te kulelj kyi.

«Mejor k'on kyinxik achi' tzan tpaj nya'tx nim chib'j wi'j. Tzul junky werman. Tetzji nim chib'j ti'j» kyi te chib kyi.

«Bwen, pax naji wa'il junky palaj wutzni» kyi te kulelj kyi.

«Ntons, ma kyinx» kyi te chib kyi.

Yaji ya ma tzul te nim chib, yaji oky'ix b'et te nim chib ti'j utz. Ya te kulelj oxik xhcha'o' tky'ik b'et te nim chib kyi.

«¿Ab'l ma'tx ky'ik b'et ti'j wutzni?» kyi te kulelj kyi.

«A'in wetz» kyi te nim chib kyi. Tetz nim tuj twi' taj stzaq'b'e' te kulelj.

«Ajna'l kyinpon awi'j. Ajna'l otxe'l nchi'» kyi te kulelj.


«Pwes bwen» kyi te nim chib. «Sek' atzaj» kyi kyi.

Yaji oqet k'otzlet te kulelj nink'ajchaq utz. Yaji oxik lipan te kulelj ti'j te nim chib kyi. Ya ma tz'ajtz meltz'jik te nim chib ti'j te kulelj, oxik stoko' tuky'i tkach max tuj nim a' okyaqon te kulelj kyi. Ntons te kulelj ax okaj kamik tuj nim a' kyi. Ya k'onti'l ob'antik tjatz. Ntons te kulelj k'onti'l kansan. A'e' kye chib eb'ajkansan tetz.

Ajna'l nkyeb'ajchalaj, nkyeb'et kontent ti'j utz ajna'l. K'onti'l ab'l nkyxob'le', komo ojetq naj te kulelj kyi.

Bwen, ntons tzani nmankun aj oky'ik ti'j jun kulelj tuky'i ox chib.

A'ox ntzani.





## Tal Lo'xh

Bwen, at tuq jun tal xuj Lo'xh tb'i kyi.

Jun q'ij tetz oxik tuj k'ul saqchb'ilon. Woknoj ky'ila'j ub'ech twitz b'ix ejaw tiqa' kye ub'ech kyi. Atqet tuq te jun jay naqa'j, k'onti'l tuq akyeqet tajawil te jay. Per tajaw te jay xo'je' tuq kyi, jun tman xo'j tuky'i jun twi' xo'j b'ix jun tal kyk'wa'al, kyi. Ojetq tuq kyeb'ajxik xb'ak'on. Jaqo' tuq tlamelul te jay kyi.

Ntons tzaj te Lo'xh, owox tuj b'ix atqet tuq jun mes tuky'i ox laq. Jun laq nim tuky'i jun saqamb'oj tuky'i jun ch'i nikit b'ix atqex lech tuq kyuj kyi. Yaji te Lo'xh owel tniky'b'e' te nim laq; per tz'e'k tuq te lech kyi. Ax owel tniky'b'e' te junky mas saqamb'oj; ax tz'e'k tuq kyi. Yaji oqex tniky'b'e' te junky ch'i nikit. Tetzji b'an amunt, galan, nya'tx tuq tz'e'k. Omankun te jun nikit titza' kyi.

Yaji txik te'e', ateb'ajqet ox wit'lelj tuj te jay kyi. Jun nim per b'an kaw tqet wit'let tajsik kyi. Junky saqamb'oj ax kaw tqet wit'let tajsik kyi. B'ix junky ch'i nikit wit'lelj, tetzji galan, per tzan talal b'eyx oqex laqik te wit'lelj kyi.

Yaji txik te'e', ateb'ajqet ox watub'j kyi. Ikja'n tuq stzaj twatl b'ix oxik waton twi' te jun nim watub'j. Tetz ni'n b'an

kaw tqet witan kyi. Junky saqamb'oj ax kaw tqet witan kyi. Yatzun te junky ch'i nikit watub'j, a te nini b'an q'u'yin kyi. B'eyx owul twatl twitz te watub'j. Alegr twatl kyi.

Ya ma kye'ul tajawil te jay, jkebaser! Ya ma xik kyen twi' kymes, ojetq tuq tqex niky'b'e' te kytas tuky'i kylech kyi.

«¿Per ab'l ma qex niky'b'en te nlechni?» kyi te ma tij xo'j ikxjani kyi.

«Per ax wetz. ¿Ab'l ma qex niky'b'en te nlechni?» kyi te twi' xo'j kyi.

Yaji ax kyi te tal xo'j: «Ax wetz. ¿Ab'l ma qex niky'b'en nlech b'ix ma'tx mankun titza'ni?» kyi te tal xo'j kyi.

Ojaw stzyu' te stas. Nqex te'e' tuq tuj, ojetq tuq mankun tuj kyi.





B'ix yaji eb'ajxik wit'litel twi' te kywit'lel.

«¿Per ab'l ma tzul wit'litel twi' te nwit'lelni?» kyi te ma tij xo'j.

«B'ix ax wetz nwit'lel. ¿Ab'l ma qet wit'let twi'?» kyi te twi' xo'j kyi.

«B'ix ax wetz nwit'lel. ¿Ab'l ma tzul wit'lelet twi' b'ix b'eyx ma'tx qex tpa'o' tzan talalni?» kyi te tal xo'j kyi.

«Mejor qwa'q waton» kyi te k'wa'lon, oxik tq'uma' te txu'jel ky'i tk'wa'al kyi.

«Pwes bwen» kyekyi kyi. Exik waton tuj kywatub'.

«¿Per ab'l ma qet witan tuj nwatub'?» kyi te ma tij xo'j kyi.

Yaji ax te twi' oxik stzaq'b'e': «Ax wetz tuj nwatub'. ¿Ab'l ma qet witan tuq tuj?» kyi te twi' kyi.

Yaji te tal xo'j: «¿Per ab'l nwitan tuj nwatub'ni? ¿B'ix tzunx nwitanni!» kyi kyi.

N'ok kye'e' te twatub'. Yaji derepent tel twatl te Lo'xh b'ix oxob' byenech txik te'e' ateb'ajqet tajawil te jay b'ix nya'tx xjale' sinoke xo'j tuq kyi. Ateqet tuq ox xo'j nkyeka'yin ti'j te Lo'xh. Te Lo'xh njaw wayun b'ix n'exnaj oqik tzi. Max tjay oq'a'et.

Ajna'l ya k'onti'l nxik laq'chet xb'ak'on b'ix ya k'onti'l n'ox tuj jun jay aj jaqonkaj tlamelul b'ix qa k'onti'l ateqet te tajawil.

Bwen a'ox tzani nmankun aj oky'ik ti'j tal Lo'xh oqtxi'.



## Jun Kyej Tuky'i Jun Xtx'o'

Bwen, at tuq jun xtx'o' tuky'i jun kyej kyi. Kyetz nkyeyolin ab'l tuq jun poral oqelan kyi.

«Wetz mas poral kyin'oqelan awitz yatz» kyi te kyej te xtx'o' kyi. «Yatz k'on b'a'n chb'et per wetz poral kyinb'et. Wetz kyinx'e'l awe'e' titza' kyin'oqelan» kyi te kyej, txik tq'uma' te xtx'o' kyi. «Mas poral kyinxlink'an. Yatz xtx'o' yatz kyeb'a'. Qoxik oqelanchaq txini aber ab'l opoyon tb'aya'» kyi te kyej, txik tq'uma' te xtx'o' kyi.

«Pwes b'a'nalo» kyi te xtx'o'. «Aber ab'l jun qetz ok'uluyon ganar» kyi te xtx'o' kyi.

Kye xtx'o' owok kchimo' kyib' ky'ila'j kyb'et. Nkyeyolin tuq kyib' kyib'x kyetz kyi. «Aber titza' qo'okel ajna'l. Ajna'l intxik jun qetz ja' poyon te kyej wa'letel tuj fil. Yaji opoyon te kyej ojetq tpon te jun qetz. Yaji a'o' qopoyon tb'aya' twitz te kyej» kyekyi kyi.

Ntons e'aq'ik, exik oqelan tuj kyfil b'ix eb'ajxik lipan kye xtx'o' kyeb'a', kyeb'a'. Ntons kyeb'a' kyel kye xtx'o'. Nijunwt kyetz k'on b'a'n kye'oqelan. Oxik lipan jun, oxik lipan junky, oxik lipan junky tzan tpon tuj fil. Komo ky'ila'j kyb'et nxik ksipa' kyib'.

Ya te kyej cha xhchukel tetz per tetz poral tz'oqelan.  
Jun xlink'an, kab'e' xlink'an, jun rat npon ja' npon wa'let tuj  
fil. Tetz nxik kyaqil ja'chq nya'tx cha jun pedas, nya'tx  
iktza' kye ttx'o'. ꞑPer kebaser! Ojetq tpon te ttx'o' tuj  
twa'lb'il tpon te kyej. Ntons tzajb'aj te kyej.

«ꞑTitza' ma xhch'ul luwew b'ix k'on b'a'n xhch'oqelan?»  
kyi te kyej kyi. «Ajna'l ma chk'ulun ganar b'ix k'on b'a'n  
xhch'oqelan.»

«Wetz a'in ma kyink'ulun ganar» kyi te ttx'o'. «B'ix  
k'on b'a'n kyin'oqelan» kyi kyi

Ntons ikxji ok'ulun ganar te ttx'o' tzan tpaj ky'ila'j  
kyb'et. K'onti'l teb'en te kyej qa ky'ila'j kyb'et tuq. Ikxji te  
kyej k'onti'l ok'ulun ganar. Oje b'isun ojetq kaj tuky'i  
tky'exaw. Bwen, tzani nmankun aj oky'ik ti'j jun ttx'o'  
tuky'i jun kyej.





## Jun Alon Chib Tuky'i Jun Xo'j

Bwen, max tuj jun montañ at tuq jun alon chib tuky'i wuq tal kyi. At tuq jun kyjay tb'anil b'ix byenech tuq b'ix ketant tuq kywe' tzi tuj montañ. Nkyechalaj tuq tzi kyi.

Jun q'ij te alon, xwa'q xb'ak'on tuj junky montañ b'ix ekaj tlamó' kye tal tuj tjay kyi b'ix oxik tq'uma' kye tal ikxjani kyi: «K'on tz'otz ejaqo' tlamelul te jay tzan tpaj at jun xo'j nb'et. Tgan tzan qxik xhchi'. K'on tz'otz ejaqo' qjay. Ma'tx kaj nq'uma' etetz» kyi te alon kyi.

«B'a'n» kyekyi kye tal chib kyi.

Yaji te alon oxik tuj montañ.





Ntons te xo'j ojetq kye'ok te'e' kye tal chib. Ky'ila'j'el eb'ajxik te'e'. «Aj ninije' kyexe'l nchi» kyi te xo'j ti'j tanim kyi. «Xikwit nnan xb'ak'on laq'chik ntons kyinx'e'l cho'ol kye tal chib» kyi kyi. Nkyexik te'e' kye tal chib. Opon laq'chet ti'j kyjay kye tal chib kyi.

Yaji e'ox tq'olb'e' ikxjani kyi: «Pwes wal, tox ejaqo' tlamelul te jay» kyi te xo'j kyi.

«Nlay» kyi te tal chib. «Yatz sloj tuj awalq tzan tpaj nya'tx a'ich qnanna» kyekyi kyi.

«A'in wetz enan tzan tpaj ma'tx qex ky'ixwik tuj walq tzan tpaj yab'in tzan xk'utxa'mj» kyi te xo'j kyi.

Ntons kye tal chib owetz kyka'yi' tuj jun xko'p. Q'eq tuq toq.

«Per yatz nya'tx a'ich qnanna» kyekyi kye tal chib kyi. K'onti'l owox kyjaqo' te lamel twitz te xo'j.

Yaji oxik te xo'j tuky'i jun ichan tajawil mulin ja' nkyekye'en arin kyi.

«Intok asi' ch'in saq ti'j woq tuky'i arin. Qa nlay tz'ok asi' otxe'l nchi» txik tq'uma' te xo'j te ichan kyi.

Ya te ichan owox tswa' te arin ti'j toq te xo'j tzan tpaj oxob' te ichan tzan k'on txik chi'. Ikxji owox saq toq te xo'j. Yaji opon ti'j kyjay kye chib kyi.

«Intox ejaqo' tlamelul te jay wal» kyi te xo'j kyi.

B'ix owex kye'e' tuj xko'p. Yaji saq toq te xo'j. Ntons nkyechalaj kye tal chib kyi.

«Ma'tx tzul qnan» kyekyi kyi. «Ajna'l intotz qjaqo' tlamelul te jay twitz te qnan tzan tpaj tetz saq toq. Qnan ma'tx tzul ajna'l» kyekyi kyi.

Yaji owox kyjaqo' per kebaser nya'tx tuq kynan. Ya ma tz'ok kyen jun ma b'i'xh xo'j tuq kyi. Ntons eb'ajxik chi' tzan te xo'j. B'ix cha jun kaj ewan txe' te jay. Ya kye txq'anqy eb'ajmankun tzan te xo'j kyi.

Ntons yaji, ya ma tzul te alon xb'ak'on, ya ma xik te'e' tuj jay, cha jun tal atqet tuq. Ojetq kyemankun kye txq'anqy kyi. B'ix ojetq qet witan te xo'j stzi' kyjay kye chib kyi. Ojetq tnoj tk'u'j te xo'j. Ntons tzaj te alon chib, oqet tk'upu' tk'u'j te xo'j, itz'oje'x tuq kye tal kyox te'e' tuj tk'u'j te xo'j kyi. Ntons eb'aj'etz tiq'i' kye tal kyi. Yaji oqex tnojsa' ab'j tuj tk'u'j te xo'j kyi.

Ya ma tz'el twatl te xo'j b'ix otna'oj b'an nk'achjik tuq. Yaji oqex, okyaqon tuj jun nim a' b'ix owokten uk'al a' kyi. Ya ma mankun tuk'an a', oqet lijan tuj a'. Ya k'onti'l ob'antik tb'et kyi. K'onti'l nb'antik tjatz junky'el te xo'j. Ntons ojaw jaq'b'ik, ax tzi okamik tuj a' kyi. B'eyx okamik b'ix owex iqa' tzan te a' kyi.

Ya kye chib oje kyeb'ajchalaj tok kye'e' ojetq xik iqa' te xo'j tzan a'. Yaji kyetz eqet najan kontent tuj kyjay. Ya k'onti'l eb'ajxob' tuj montañ kyi.

Bwen, tzani nmankun aj oky'ik ti'j jun xo'j oqtxi'.



## Ox Kuch Tuky'i Jun Xo'j

Bwen, jun el ate' tuq ox kuch, kyerman tuq kyib' kyi. Kygan tuq tqet kyk'ulu' kyjay, junjun te junjun. Per kab'e' kyetz b'an ky'aje' tuq kyi, k'on kygan tuq tzan kynajsan nim tzan tb'antik kyjay b'ix k'on kygan tuq tzan kyaq'unan nim kyi.

Te jun oqet tk'ulu' tjay puro ky'im, twi' tuky'i txe' kyaqil. Jun rat tb'antik titza' kyi. Yaji tetz nchalaj, ojetq tb'antik te tjay. Yaji nchimb'an tuky'i tyitar twitz tjay kyi.

B'ix yaji te tkab'i' kuch ax wokten k'ulul tetz tjay. Komo ax b'an ky'aj tetz, astiltzunji oqet tk'ulu' tuky'i puro toq kjoj per sten tb'ajlen b'ix nya'tx byenech. Jun rat tb'antik titza' kyi. Yaji nchalaj, ojetq tb'antik te tjay titza' kyi. Yaji owokten chimb'al te jun tal tyitar aj cha nqet qitz'o' twitz kyi.

Yaji te toxi' kuch, tetz owokten k'ulul jun tjay. Per tetz b'a'n tz'aq'unan. Tetz oqet tk'ulu' jun tjay tuky'i puro loq' tuky'i puro tej twi'. Oxik tiq'i' ky'ila'j q'ij tzan tb'antik te tjay tzan tpaj kyeb'a' tuq nqet tk'ulu'. Per okaj galan tjay te toxi' kuch kyi.

Yaji, jun q'ij, pon te jun xo'j tuky'i te tb'ay kuch kyi.

«Wetz ajna'l otxe'l nchi» kyi te xo'j kyi.

Ntons te kuch oxob' b'ix ojaw nuqin tzan txob'al kyi. Te xo'j oxik txupi' kongan b'ix yaji tjay te kuch oqet tilan kyi. Komo puro ky'im, k'onti'l talal, nya'tx tzinun. Te kuch k'onti'l oqet tk'ulu' galan tjay. Astilji kebal tzan te xo'j.

Ntons te kuch owoqik b'ix opon tuky'i junky terman. K'onti'l otzij tib'. K'onti'l otzyet tzan te xo'j. K'onti'l oxik chi' kyi.

Ya junky iwitq opon te xo'j tuky'i te tkab'i' kuch kyi.

«Wetz ajna'l otxe'l nchi» kyi te xo'j kyi.





Te kuch oxob' b'ix oje nuqin tzan txob'al. Per te xo'j k'onti'l n'el ti'j tk'u'j. Nxik xtxupi' tjay te kuch, per kongan. Ntons oqet tilan tjay te kuch. Komo puro toq kjoj k'onti'l toqtzal astilji kebal oqet xitu' tzan te xo'j. Per ax owoqik te tkab'i' kuch. Yaji opon koletel tuky'i toxi' terman kyi.

Yaji junky iwitq oponky te xo'j tuky'i te toxi' kuch kyi.

«Ajna'l yatz otxe'l nchi'» kyi, txik tq'uma' kyi.

Te kuch galan tetz tjay, k'onti'l oxob' tetz tzan tpaj tetz tjay puro loq' tuky'i tej twi'. B'ix ate'ox tuq tuky'i'l kye kykab'il terman aj ojetq qet xitu' kyjay kyi.

«K'on qoxob'» kyi tetz, txik tq'uma' kye terman kyi.

«Wetz njay galan k'ulb'en tetz.»

«Bwen» kyekyi kye kab'e'ky kyi.

B'ix te xo'j b'an k'onti'l n'el ti'j tk'u'j. Nxik xtxupi' kongan. Per k'onti'l oqet tilan te jay kyi.

Tzan tpaj galan tqetlén k'ulu' tzan te kuch kyi. Ya te xo'j cha nxejun tuq tjtazlen tanim ale'ji tzan tpaj txiklen xtxupi'. B'ix te jay k'onti'l oqet tilan kyi.

«K'onti'l nqet tilan te ejay tzan exik nchi'. Mejoy ajna'l okyinjawex twi' jay b'ix tzi kyinqtex tuj txkyin te jay» kyi te xo'j kyi.

Ntons yaji kyekyi kye kuch: «Ajna'l instzaj qjoyo' si' intqex qsi' q'aq' b'ix oqtex qloqlonsa' jun perol te kyaq a' ti'j te xo'j. Karedchaq. Intox te si' tjaq' te perol» kyekyi kyi.

Ntons owox ksi' te si'. Yaji jun rat stzaj loqlon te a' tuj

te perol. B'an nctxakapun tuq te a' kyi.

Yatzun te xo'j, k'onti'l n'el ti'j tk'u'j tzan tox tuj txkyin te jay. ;Per kebaser! Ya ma tz'otz tuj txkyin te jay, dech otzaj tz'aqik b'ix dech oxik punk'an tuj te perol kyi.

Ntons k'onti'l n'el ti'j tk'u'j tuq te xo'j tzan txik xhchi' kye kuch. K'on tuq tgan tzan tipan wa'ij. ;Per kebaser! B'an nctxakapun tuq te a' tuj te perol. B'ix komo kye kuch tzi oqet ksi' te perol mer tumelil tjaq' ja' tuq ikja'n totz ntons owotz b'ix dech oxik tuj te perol. Dech owotz b'ix dech oxik tuj te perol. Ixji onaj kyi. Ntons ya k'onti'l exik xhchi' kye kuch tzan tpaj kyetz oqet kyb'isu' galan tzan tpaj liste' b'ix byenech tuq k'ulb'en te jay kyi.

Ya junky iwitq te tb'ay kuch ky'i tkab'i' kuch, kyetz oqet kyk'ulu' kyjay galan tzan k'on kxik chi' tzan nijunwt txkup. Ajna'l nya'tx ky'aje'. B'a'n kye'aq'unan. Kyoxil b'a'n kyechimb'an yitar tuj kyjay b'ix alegr ate'.

Bwen, ntons tzani nmankun aj oky'ik kyi'j kye ox kuch tuky'i jun xo'j. A'ox ntzani.

